

Morning Regional Dogri News Bulletin, 29th June 2024

मार्निंग डोगरी न्यूज़ बुलेटिन, समें. 09-20 Hrs



Headlines

1. 52 दिनें दी श्री अमरनाथ जी दी सलाना पवित्र यात्रा अज्जै कोला बालटाल ते पहलगाम थमां शुरू होई, 4 ज्हार 22 श्रद्धालुएं दा जत्था अज्ज जम्मू थमां यात्रा आस्तै घाटी होआ रवाना।
2. स्माज दे पिछड़े दबोए दे तबकें दा सशक्तिकरण सरकार दा मुख मकसद—आखेआ उपराज्यपाल मनोज सिन्हा होरें।
3. डीजीपी आर.आर.स्वैन होरें आखेआ ग्राम रक्षा समूहें गी जम्मू कश्मीर च होर मजबूत बनाया जाग।
4. म्दें दे आईसीसी टी-20 विश्व कप 2024 दे फाइनल च अज्ज भारत दा मकाबला दक्खन अफ्रीका कन्नै बारबाडोस च होग।



Amarnath Yatra

52 दिन चलने आली पवित्र श्री अमरनाथ जी दी यात्रा अज्ज पहलगाम ते बालटाल दौनें रस्ते थमां कड़े सुरक्षा बंदोबस्ते बश्कार शुरू होई। बालटाल ते नूनवान बेस कैपें च कल पुज्जने आले श्रद्धालु अज्ज प्राकृतिक शिव लिंग दे दर्शन करगंन। एह यात्रा 19 अगस्त रक्खड़ पुन्या तोड़ी चलोग। यूटी प्रशासन नै इस पवित्र यात्रा गी सेई ढंगै सिर चलाने आस्तै हर तरीके दी तैआरी कीती दी ऐ। कल उपराज्यपाल मनोज सिन्हा होरें 4 ज्हार 603 यात्रुएं दे पैहले जत्थे गी यात्री निवास बेस कैप भगवती नगर जम्मू थमां झंडी दस्सियै रवाना कीता हा।



Amarnath Yatra 2nd Batch

तोआई श्री अमरनाथ यात्रुएं दा दुआ जत्था अज्ज भगवती नगर बेस कैप थमां कश्मीर घाटी आस्तै रवाना होई गेआ ऐ। इस जत्थे च 4 ज्हार 24 श्रद्धालु न। 200 गड्डिएं च सुआर होइयै यात्रु श्री अमरनाथ यात्रा आस्तै कश्मीर पुज्जगंन। इंदे च 2 ज्हार 935 मर्द, 788 महिला, 21 बच्चे, 231 साधु ते 62 साध्वियां शामिल न। 1

ज्हार 850 श्रद्धालु बालटाल ते 2 ज्हार 179 श्रद्धालु पहलगाम बेस कैंप आस्तै खाना होए न।फ अजें तोड़ी श्री अमरनाथ जी दे दर्शन आस्तै जाने आले श्रद्धालुएं दी गिनतरी 8 ज्हार 632 पुज्जी गई ऐ।

<><><><><><>

NTA Exam

मतेयानें सरबंधी राष्ट्री अजेंसी एनटीए नै रद्द कीते गेदे ते अगड़े पाए गेदे मतेयानें लेई नमीं तरीकें दी घोषणा कीती ऐ। कल जारी इक अधिसूचना च एनटीए नै आखेआ जे यूजीसी-एनईटी जून 2024 दा मतेयान हुन 21 अगस्त थमां 4 सितम्बर बश्कार होग। यूजीसी-एनईटी दा मतेयान इस म्हीने दी 18 तरीक गी होआ हा। संयुक्त सीएसआईआर-यूजीसी-एनईटी जून 2024 दे मतेयान हुन 25 थमां 27 जुलाई बश्कार होंगन। अध्यापकें गी मता जागरूक बनाने आले 4 साला आईटीईपी कार्यक्रम च दाखले आस्तै राष्ट्री सांझा दाखला मतेयान हुन 10 जुलाई गी होग। एनटीए नै आखेआ ऐ जे ऑल इंडिया आयुष पोस्ट ग्रेजुएट एंट्रेंस टैस्ट 2024 पैहले शा तैह कार्यक्रम मताबक अगले म्हीने दी 6 तरीक गी होग। एनटीए नै मेदवारें गी होर जानकारी आस्तै आफिशल वैबसाईट www-nta.ac.in दा सैहयोग लैने आस्तै आखेआ ऐ।

<><><><><><>

Mann Ki Baat

प्रधानमंत्री नरेन्द्र मोदी कल ऐतवारें 11 बजे आकाशवाणी दे “मन की बात” कार्यक्रम राएं देश ते विदेश दे लोकें कन्नै अपने बचार सांझा करगंन। एह रेडियो कार्यक्रम दी 111मी किश्त होग। प्रधानमंत्री दा लगातार त्री बारी औहदा सांभने दे परैंत एह पैहली किश्त होग। इस कार्यक्रम दा प्रसारण सब्बने नेटवर्कें आकाशवाणी ते दूरदर्शन, आकाशवाणी न्यूज वेबसाईट ते न्यूज ऑन एयर मोबाइल ऐप पर कीता जाग। एहदा लाइव प्रसारण ऑल इंडिया न्यूज दे यू-ट्यूब चैनलें, दूरदर्शन न्यूज, प्रधानमंत्री हुंदे दफतर ते सूचना ते प्रसारण मंत्रालय च होग। हिंदी प्रसारण दे तुरत मगरा आकाशवाणी आस्सेआ मकामी भाषाएं च एहदा प्रसारण कीता जाग।

<><><><><><>

LG Mulaqat

उपराज्यपाल मनोज सिन्हा होरें आखेआ ऐ जे समाज दे पिछड़े वर्ग दा सशक्तिकरण यूटी सरकार दा पैहला मकाद ऐ ते एहदे आस्तै सरकार बक्ख-बक्ख स्तरें पर कम्म बी करा'रदी ऐ। वर्चुअल ढंगै कन्नै एलजी मुलाकात लाईव कार्यक्रम दरान उपराज्यपाल होरें लोकें कन्नै गल्लबात कीती ते उनेंगी पेश आ'रदिएं मुश्कलें बारे बी जानेआ। मनोज सिन्हा होरें अधिकारिएं गी लोकें दी मुश्कलें गी तौले शा तौले हल्ल करने दे निर्देश दित्ते ते कन्नै आखेआ जे समाज कल्याण स्कीमें दा लाह जरूरतमंद लोकें तोड़ी पजाया जाए। उपराज्यपाल

होरें आखेआ जे जिले च चला'रदी स्कीमें हेठ होआ'रदे कम्मं पर तक्क बनाइयै रखने आस्तै हर जिले च जांचने ते परखने आस्तै इक मजबूत तंत्र होना लोडचदा। उपराज्यपाल होरें लोकें गी सेवा आस्तै यूटी प्रशासन गी संभाल करने आला संवेदनशील ते जवाबदेह बनने दी जरूरत पर जोर पाया।

<><><><><><>

Foreign Secretary

1989 बेंच दे भारतीय विदेश सेवा दे आईएफएस अधिकारी विक्रम मिस्त्री होरें गी अगले विदेश सचिव दे तौर पर नियुक्त कीता गेआ ऐ। ओह 15 जुलाई थमां इस औहदे पर तैनात कीता जाग। ओह विनय मोहन क्वात्रा हुंदी थाहर लैंगन। जिनेंगी इस ब'रे मार्च म्हीने 6एं म्हीनें दा सेवा—विस्तार दित्ता गेआ हा।

<><><><><><>

Airport

नमीं दिल्ली च इंदिरा गांधी अंतर्राष्ट्री हवाई अड्डे पर टर्मिनल टी-1 दी छत्त डेई पौने आली घटना मगरा बंद होने दी पछोकड़ै च शैहरी हवाबाजी सरबंधी मंत्रालय नै ब्हाई अड्डें सरबंधी भारती प्राधिकरण गी निर्देश दित्ते न जे ओह मुख भरै दे सब्बने लौहके ते बड्डे ब्हाई अड्डें दी ढांचागत मजबूती दा पता लाने दे मकसद कन्नै व्यापक निरीक्षण आली प्रक्रिया दा आयोजन करन। मंत्रालय नै हुक्म दितता ऐ जे निरीक्षण आली इस प्रक्रिया गी अगले 2 शा 5 दिनें अंदर सबूरा कीता जाना लोडचदा ऐ तां जे इस किस्मै दियां घटनां पही पेश नेई औन।

<><><><><><>

Hiranagar Cops

पुलस महानिदेशक आर.आर.स्वैन होरें आखेआ जे ग्राम रक्षा समूहें ते एसपीओ गी कठुआ ते जम्मू कश्मीर दे दुए हिस्से च मजबूत बनाया जाग। उनें आखेआ जे आतंकवाद कन्नै निबड्डने आस्तै पुलस ते लोकें दा नेडमा तालमेल बडी बड्डी शक्ति ऐ ते इसी बनाइयै रखना जरूरी ऐ। डीजीपी होरें जिला पुलस कठुआ आस्सेआ आयोजित इक कार्यक्रम च बोला'रदे हे। इस मौके किश दिने पैहले हीरानगर दे साइदा सुखल ग्रां च 2 आतंकवादिएं गी मारी मकाने च अहम भूमका नभाने आस्तै 9 एसपीओएं गी कांस्टेबल दे तौर पर पक्का कीता गेआ।

<><><><><><>

Special Summary

मुख्य चुनां अधिकारी जम्मू कश्मीर पी.के.पोले होरें कल यूटी दी बक्ख-बक्ख सियासी पार्टिएं कन्नै जम्मू च बैठक कीती। एह बैठकक्षेत्र च चला'रदे फोटो सनें मतदाता सूचि दा विशेष संक्षिप्त पुनिरीक्षण दे चलदे लाई गई। बैठक च मुख्य चुनां अधिकारी होरें संक्षिप्त पुनिरीक्षण दी मजबूती पर लोह पाई ते सेई ते अपडेटिड मतदाता सूचि तैआर करने आस्तै सारी राजनीतिक पार्टिएं गी जिला प्रशासनं गी सहायता करने आस्तै आखेआ तां जे पूरी प्रक्रिया च मती पारदर्शिता आन्नी जाई सकै। इस बैठक च सियासी पार्टिएं गी पोलिंग स्टेशन च एएमएफ यानि घट्टोघट्ट सुविधाएं प्रदान करने ते थाहर बदलने जनेई सुविधा ते पोलिंग स्टेशनं गी हर तरीके तैआर कीते जाने बारे जानकारी दित्ती गई। ध्यानजोग ऐ जे बसनीक मतदाता सूचि च अपना ब्यौरा चैक बी करी सकदे न ते उसी ठीक बी करी सकदे न। एहदे आस्तै उनेंगी नैशनल वोटर सर्विस पोर्टल पर लागइन करना लोड़चदा ऐ। एहदे इलावा पंजीकृत मतदाता अपनी हालिया स्थिति दिक्खी सकदे न। दूई पंजीकृत सियासी पार्टिएं कन्नै बी इसै चाल्ली दी बैठक कीती जाग।



IIT Jammu

आईआईटी जम्मू दा डीप-टैक्क स्टार्ट अप –एसएपी ऐरोस्पेस रक्षा अनुसंधान ते विकास संगठन डीआरडीओ दी टीडीएफ डेयर टू ड्रीम प्रतियोगिता दे चौथे संस्करण दी सामान्य श्रेणी च जेत्तु दे तौर पर उभरेआ ऐ। इस प्रतियोगिता दा मकसद विश्वसनीय स्टार्ट-अप्स गी सैहयोग ते समर्थन देना ते उंदिएं तकनीकें च होर बेह्तरी लेई महत्वपूर्ण संसाधन उपलब्ध करोआना ऐ। डॉ. शान मुगा दास के.पी.हुंदी अगुवाई आली इस टीम च प्रतिभाशालील विद्यार्थी आयूष दिव्यांश ते प्रीतम जमोद शामिल न जेहड़े अगली पीढ़ी दे एयरो-इंजन विकसित करै करदे न जिंदे राएं जंग च इस्तेमाल होने आले ड्रोनं दी समर्थ ते कारकरदगी च इक नमीं क्रांति आई सकदी ऐ।



Outreach Kaghote

जम्मू कश्मीर प्रशासन आस्सेआ आम लोकें तोड़ी पुज्ज बनाने सरबंधी सार्वजनिक आउटरीच कार्यक्रम दे इक हिस्से दे तौर पर सूचना विभाग दिएं सचिव रेहाना बतूल होरें कल कगोट रामनगर च आम लोकें दिएं समस्याएं गी सुनने ते उंदे नबेड़े आला इक कार्यक्रम लोआया। इस मौके पर मकामी लोकें केई मसलें उंदे अग्गे रखे जिंदे च कगोट आले हाई स्कूल दा दर्जा बधाने, राजस्व रिकार्डें दे गोआची जाने दा मसला, अध्यापकें दिएं खाली पेदी असामिएं गी पुर करने दी मंग ते इलाके च पीने आले पानी दी कमी आले मामले मुख्य तौर पर शामिल हे। सचिव होरें सरबंधत अधिकारिएं गी निर्देश दित्ते जे ओह लोकें दे जायज मसलें गी पैहल दी बिनाह पर हल करोआन ते कन्नै बकाया रोंहदे मसलें दी तफसीली रिपोर्ट बी जमा करोआन तां जे उसी आला

अधिकारिणं दे बचार लेई भेजेआ जाई सकै । उनें बक्ख-बक्ख फलैगशिप योजनाएं ते कार्यक्रमें बारे अफसरें थमां प्रतिक्रिया बी हासल कीती ।



T-20

2024 आले आईसीसी टी-20 दे फाइनल च अज्ज भारत दा मकाबला दक्खन अफ्रीका कन्नै होग । एह मैच बारबीडोस दे किंग्सटन ओवल मैदान च खेड्डेआ जाग । इनें दौनें टीमें प्रतियोगिता च अजे तोड़ी कोई मैच नेई हारेआ ऐ । रोहित शर्मा दी अगुवाई च भारत दी टीम दा मनोबल बड़ा बधे दा ऐ । भारत दी टीम नै सैमीफाइनल च इंग्लैंड दी टीम गी 68 रंजे कन्नै हराइयै फाइनल च थाहर पक्की कीती ही ।



Weather

अज्ज जम्मू च बडले थमां बरखा बरा'रदी ऐ ते इस कारण मौसम बड़ा सुआमा होई गेआ ऐ । एहदे कन्नै गै जम्मू खित्ते च लोके गी तपदी गर्मी थमां राहत थहोई ऐ । तोआई कल जम्मू च बद्धोबद्ध तापमान 38.6 डिग्री सैल्सियस रिकार्ड कीता गेआ जदके एहदे शा पैहली आली रातीं दा घट्टोघट्ट तापमान 27.7 डिग्री सैल्सियस रेआ ।

